



matematikistoj) de la *Internacia Ortografio*, kiun kaj UN kaj ISO komencas uzi. Do la cetero estas plej internacia . . . kaj konata de ĉiu Anglolingvulo.

Tio signifas, ke ni konsilas al la E-istoj uzi la NHA sur la reto kaj sekve havigi al nia lingvo alfabeton konforman al la mondaj normoj, sed ne al niaj kapricaj ideoj. Do : NE ! Ni ne deziras ŝanĝi la presitan aspekton de nia lingvo. Sed JES ! Ni deziras ŝanĝi la retan aspekton de nia lingvo, kiu similas tiel al kameleono : ĉiu E-isto kaprice uzas alian skribmanieron . . .

NE post dek jaroj, sed tuj, ĉar UNICODE bezonis 30 jarojn, por ke la homoj iom konatiĝu kun ties nomo : ĝi bezonos aliajn 30 jarojn, por ĝeneraliĝi. Poste ĝi restos nealirebla al multaj simplaj E-istoj . . .

Notu, ke ĉiu lingvo faras tion, kio ŝajnas bona por ĝi sur sia teritorio. Sed se vi demandas, kial ni ne farus same sur la nia, mi devus respondi, ke nia teritorio estas la mondo. Sekve ni ne estas la mastroj !

La ĉefa obstaklo kontraŭ la E-istoj, estas ili mem. Ili opinias sin solaj en la mondo. Ili rigardu kaj vidu la realon !

Sinjoro NORVELL, kredu min ! Ni devas armi nian lingvon per nova (ho ! parte nova !) alfabeto. Mi ne vidos la sukceson de tiu entrepreno, sed vi, pli juna kaj pli vigla, vi ja povos ĝin vidi !

Nia lingvo tamen valoras sufiĉe, por ke ni klopodu iomete favore al ĝia estonteco. Supren la koroj !

D-ro André ALBAULT (2001 05 02)

### KOMENTARIO PRI LA RESPONDO

Mi estas tre dankema al D-ro Albault, ke supre li bele klarigis la projekton de la “Nova Help-Alfabeto”. Mi tute ne komprenis, ke ĝi estas alfabeto nur por la elektronika reto kaj neniel minacas la Zamenhofan ortografion de nia skribita kaj presita lingvo.

Malgraŭ lia pravigo, mi dubas ke la NHA estos tre utila en la reto. Mi estas inter tiuj, kiuj rete uzas kaprican skribmanieron: miaj ĉapelitaj literoj (,c^’, ,g^’, ,h^’, ,j^’, ,s^’, kaj aŭ ,u~’ aŭ ,u’) estas tuj rekoneblaj, se oni dezirus senpere legi, kaj estas facile transformigi ilin al tradiciaj literoj per simpla makroo de iu ajn tekstigilo. Tiu ĉi lasta kaj grava avantaĝo ne troviĝas en la NHA, miaopinie.

Mi bonvenigas la okazon publike diskuti la aferon. Estas granda honoro, ke D-ro André Albault, grava kaj vaste konata Esperantisto, skribis al ni por klarigi la Novan Help-Alfabeton.

— Steĉjo Norvell

## GRATULO EL DANLANDO

S-ro Preben Bagger, emerita dana inĝeniero kaj vojaĝinto al Usono kaj Kanado, bonkore skribis jen:

„Koran dankon pro la jarkolekto de *Inter Ni*. ... mi nur dum Pasko komencis foliumi ĝin.

„Sed trafoliumadon baldaŭ anstataŭis tralego, ĉar ege min surprizis la tre alta nivelo, ne nur lingve, sed ankaŭ enhave. Ĉe ni lokaj bultenoj ofte estas ne tre interesaj, kaj lingve nematuraj. Do, gratulon!”

Post multaj horoj da redaktado kaj kompostado, estas tre agrable al ni iom ripozi en laŭdlumo. Dankon, Preben Bagger.

— la Redakcio

## ARBARA AVERTO



Nuntempe en norda Kalifornio estas problemo pri sovaĝaj ursoj en la arbaro. La registaro rekomendas, ke vagantoj en la arbaro kunportu pipropistolojn por defendi sin kaj alkroĉu ĉenojn de sonoriletoj ĉirkaŭ la maleoloj por averti la ursojn.

Estas du specioj de ursoj: nigraj kaj grizaj. Ili estas facile distingeblaj: La nigraj ursoj estas aŭ brunkoloraj aŭ nigra-koloraj, malgrandaj, preferas ne renkonti homojn, kaj efektive ne estas tiom ferocaj. La grizaj ursoj estas grizaj, tre grandaj, furiozaj, odoras de pipro, kaj oni povas aŭdi tintadon en la ventroj.

## CERBUMILAJ RESPONDOJ

En la maja numero, estis tri cerbumiloj de Prof. Ladislaŭ SIMON en Oradea, Rumanio. Ĉu vi povis solvi ilin? Gratulon al Profesoro Léo Kpakpo-Koumi Y. Adovi de Lomé, Togolando, kiu jam sendis al ni la ĝustajn respondojn:

3. B = 8

2. 4 infanoj

1. 82 piedoj